

REGIONAL NEWS BULLETIN

HEADLINES (EVENING)

Date – 06/06/2024

Time - 18:30 -18:40Hrs

- Chief Minister Pu Lalduhoma kaihhruiin vawiin khan Council of Minister an thukhawm.
- Melthum a chenna in 3 te chu ruahtui a tam chuan a himlo a ngaih a nih avangin, heng in 3 te hi hmun him lam pan rih tura tih an ni.
- National Democratic Alliance (NDA) te chu sawrkar siam turin an inpuahchah mek.
- Israel sipaiten Gaza an kahnaah mi 30 an thi a, an zinga atam zawk hi hmeichhia leh naupang an ni.

<><><>

CABINET MEETING

Chief Minister Pu Lalduhoma kaihhruiin vawiin khan Council of Ministers thutkhawm CM Conference Hall ah neih a ni a, thurel zingah Myanmar nena inrina hung chungchang leh zalen raka ramria inkalpawhna Free Movement Regime a tel.

Pu Lalduhoma kaihhrui Council of Ministers meeting ah hian Agenda hrang hrang 20 chhawpchhuah a ni a, chanchin ziah lai hian Meetinga thurel tura chhawpchhuahte hi pass anih leh nihloh hriat ala nilo a, Home Department atanga lut Raltlan te chhinchhiahna tur biometric data bakah ramri hung chungchang te, zalen taka ramria inkalpawhna Free Movement Regime chungchang pawh rel a ni.

Heng bakah hian Centrally Sponsored Schemes (CSS) hnuaia hnathawk te chungchang leh Mizoram sawrkar hnuaia contract leh provisional employee te dahngheh chungchang rel a ni a, aikal chungchanga dan kenkawh tur rel niin Rifle Allowance cheng 40 ni thin chu cheng 80 a tihsan rawtna pawh sawiho a ni.

Thutkhawmah hian Mizoram Ceiling on Government Guarantees (Amendment) Bill, 2024, Draft Mizoram Electric Vehicle Policy, 2024 leh ruangphurh chungchanga sawrkar kenkawh tur chin rel a ni a, Scheduled Tribes & Other Traditional Forest Dwellers (Recognition of Forest Rights) Act, 2006 bakah Mizoram consumer te hamthatna tur chungchang rel a ni bawk.

<><><>

AMC ELECTION CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tura chuh tum te tan hming pek luh hun tawpni vawiin khan mi 4 in hming an thehlut a,

AMC Ward 19-na by election hi kil li atangin rorel lai ZPM leh eptu party MNF, Congress leh BJP ten an chuh dawn a, vawiin khan BJP chuan he inthlan atana an party candidate turin Pi K. Vanlalruati an ruat tih an party President Pu Vanlalhmuaka'n a puang a, vawiinah hian party candidate 4 te hian nomination an thehlut vek a ni.

Nimin khan MPCC President Pu Lal Thanzara chuan an candidate atan Effie Vanlalhmangaihi an ruat tih a puang a, Effie Vanlalhmangaihi hi Venghnuai Local Council member atan tum hnih thlan alo ni tawh a, Congress Mahilla ah secretary hna a chelh mek a ni.

MNF party Nomination Committee chuan Dr. Lalrinzuali Hrahse, Aizawl Kulikawn veng chu an ruat a, ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat tih an lo puang tawh a ni.

He inthlanah hian chuh tum te Nomination Paper hi naktuk June ni 7-ah endik a ni ang a, inhnukdawk duh tan June ni 10 chawhnu dar 1 thleng hun hawn a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm a ni.

<><><>

AGRI MINISTER

Agriculture Minister Pu PC Vanlalruata'n New Delhi ah Ministry of Agriculture & Farmers Welfare hotute Sumdawn dan kalhmang a sawipui.

Agriculture Minister hian New Delhi a thlaithar wholesale a zawrhna, Azadpur Mandi tlawh tel in, wholesale a thil lei thin sumdawng lian te chu sawhthing leh thlai danga insumdawn tawn dan tur a sawipui a. Sumdawng lian te hian Mizoram sawhthing an lei duh thu sawiin, an in dawr dawn a nih chuan Mizoram chhung ngeiah grading unit din ni thei se an duh thu an lo hrilh a, a rate tur leh a buaipui dan tur te la sawi chhun zawm atan an dah a ni.

Minister hian Special Secretary to Department of Fertiliser A. Neeraja hmuin kuthnathawktu ten man tlawm zawk leh chatlak lova leitha an hmuh theih dan tur a sawi pui a, Ministry of Agriculture & Farmers welfare Secretary Manoj Ahuja leh Pu Franklin L Khawbung, Joint Secretary te pawh an pisa ah hmuin anni hian sorkar laipui scheme hrang hrang hnuaiah project a tam thei ang ber theh lut turin thu an lo rawn a. Manoj Ahuja chuan Mizorama Grape, Serthlum, Lakhuihtheih leh Dragon fruit zir chiang a a tul tiin hma la nghal turin National Horticulture Board Director a hriattir nghal a ni.

<><><>

MELTHUM EVACUATION ORDER

Cyclone Remal thawh laia chhiatna thlenna hmun Melthum a chenna in 3 te chu ruahtui a tam chuan a himlo a ngaih a nih avangin, heng in 3 te hi hmun him lam pan rih tura tih an ni.

Aizawl District Disaster Management Authority Chairman, DC Pi Nazuk Kumar I chuan vawiin khan thupek hi chhuahin, kar kalta Inrinni a mithiamte'n Melthum lei minna hmun joint inspection an neihna a an hmuh chhuah angin in 3 chu ruahtui tam zawk a tlak zel chuan him lo thei a ngaih a ni a ti a, ruah a sur zel chuan a hlauhawm theih dawn avangin, heng in a cheng te hi thuleh awm hma chu an in chhuahsan rih tur a ni a ti.

Heng in 3 te hi, Pu Malsawmzuala, KK Thanga leh Hrangkhuma te chenna in a ni.

<><><>

HEROIN SEIZED

Excise & Narcotics Department chuan nimin khan hmunthumah Heroin Hawng 79 an man.

Excise & Narcotics Department chuan nimin chhun dar 12:20 khan Durthlang North-ah Heroin gram 131 (Hawng 11) leh a neitu nia puh Lalbuatsaihi (35) Durtlang North-a khawsa nia inchhal an man a, tlai dar 3:45 khan Hunthar veng kawngpuiah Heroin gram 775 (Hawng 62) leh a neitu nia puh – Lalmuansanga (23) Hnahthial, tuna Tanhril Vengthar-a khawsa mek nia inchal man in nimin vek khan Chhinga Vengah Heroin gram 79 (Hawng 6) leh a neitu nia puh – Lalsangliana (43) Chhinga Veng, M-Section-a khawsa nia inchhal an man bawk.

Nimina Excise & Narcotics Department-in heroin an man zawng zawng hi gram 985 (Hawng 79) a ni.

Heroin vanga mante hi the Narcotics Drugs & Psychotropic Substances Act, 1985 tlawhchhanin thubuai siamsak an ni a, vawiin khan Judge, Special Court (NDPS Act) hnenah thawn nghal an ni.

<><><>

CYMA

Tun hnaia ruahsur avanga tui lianin Tlawng luia PHE tui pump na a chim avang leh bungrua a len bo hlut zawng chu cheng vbch 13 hu vel nia hriat a ni.

Central YMA hnaia Health & Sanitation Sub- Committee te chuan nimin khan Reiek kai, Tlawng luia PHE Tui Pump-na hmun, tunhnaia ruah sur nasa in a tihchhiatna hmun te an tlawh a. Tui lianin a chim vang a bungrua a tih chhiat leh bungrua a len bo te chu cheng vbch 13 vel hu ni a hriat a ni tih PHE hotuten an lo hrilh a ni.

PHE thawktute sawi danin Tun tum tui lian hi kum 2017 a tuilian in a chim chin aiin feet 5 chuang a sang a chim a ngaih a ni a, Tui hi an pump na hmun ah hian chirhdum a tam em avangin vawiin thleng hian pump karlakah dum thenfai hna thawh tel zel a ngai tih an sawi bawk.

Phase- I ah hian Store Room pahnih hi tui lian hian a ti chhe hneh hle a, spare part hlu tak tak engngemaw zah a len bo bakah Store Room bula an khawl lian dah te pawh tuin a chim vek avangin tun maiah chuan a chhiat that hre turin tih nun ngam a la ni lo a, Phase -I a tui pump khawl electric hmang pahnih te hi tui in a chim ve bawk avangin Technician ten a chhiat dan an chhui mek a, khawl hi eng chen nge

hman theihloha a awm tur hi ala hriatloh a, Backup pump pahnih an neih ah pakhat chhia awmin karkhat chhungin zaa 85% siam that niin Phase -2 pump thawk thei a siam hman a ni a, Tui nut dan a zira danglam thei niin tui a nuin Phase -2 a Pump pakhat leh Phase 1 a diesel pump khawl hmangin tui an pump thin a, phase 2 pump pahnih 85% a an pump in nikhat ah maktaduaih 18 vel an pump thei ni a hriat a ni.

<><><>

ZPM PAC

Rorel lai Zoram People's Movement Political Affairs Committee (PAC) thukhawm chuan Lok Sabha MP atana thlan tlin an party candidate Pu Richard Vanlalmangaiha chu Parliament-ah zawm bik a nei dawn lova, neutral a ni ang an ti.

ZPM PAC hi nimin khan ZPM Party Office-ah President Pu Lalliansawta kaihruiin an thukhawm a, resolution siamin Lok Sabha MP inthlan neih zawk taka ZPM Official Candidate, Pu Richard Vanlalmangaiha hnehna sang tak changa thlan tlin a ni chu Zoram mipuite leh Pathian chungah an lawm takzet an ti a,

Campaign laia an lo sawi tawh thin angin Mizoram MP chuan Parliament-ah zawm bik a nei dawn lova, neutral a ni dawn tih sawiin A thu a zir zelin hawi lam an nei dawn a, Mizoram tana tha ber tur ngaihtuahin Party thutlukna ang zelin a kal dawn tih an sawi bawk.

<><><>

NDA MEETING

National Democratic Alliance (NDA) te chu sawrkar siam turin an inpuahchah mek. Vawiin khan New Delhi-a BJP President J P Nadda-a chenna inah Union Minister leh party hruaitu senior te an thukhawm a. He hunah Union Home Minister Amit Shah, ome Minister Amit Shah, Defence Minister Rajnath Singh, Union Minister-te Piyush Goyal, Pralhad Joshi, Mansukh Mandaviya leh Ashwini Vaishnaw, BJP National General Secretary Tarun Chugh, party leader Vinod Tawde bakah hruaitu dangte an tel a ni. Vawiin vek khan JD (U) hruaitute pawh Delhi-a Bihar Chief Minister Nitish Kumar-a chenna inah an inhmukhawm ve bawk a. Puan tawh angin nimin khan NDA member te chuan luangrual takin an leader atan Prime Minister Narendra Modia an lo thlang tawh a ni.

Hetihlai hian NDA Parliamentary party Meeting chu naktuk hian New Delhi ah an thukhawm dawn a. He hunah hian BJP, TDP, JDU, LJP (R), Shiv Sena (Shinde Faction), JD(S) leh an thawhpui party dang atanga MP thlan tharte an kalkhawm dawn a ni.

Puan tawh angina nimina NDA hruaitu thukhawm chuan resolution siamiin kum 10 kalta chhungin Pu Modia kaihruiina hnuaijah India chuan kawng tinrengah hma a sawn an ti a. Term thumna atana ram hruai turin mipuiin hruaitu chak tak an thlang nawn leh a ni a ti bawk.

<><><>

INDIA

INDIA bloc hruaitute vawiin khan New Delhi-a an inhmukhawm. Trinamool Congress National Secretary leh MP Abhishek Banerjee leh party leader Derek O'Brien te chuan Samajwadi Party hotupa Akhilesh Yadav chu a chenna inah an hmu a. Aam Aadmi Party leader leh Rajya Sabha MP Raghav Chadha pawhin Shiv Sena (UBT) leader Sanjay Raut a hmu bawh a. Nimin lamah inthlan result puan anih hnua a hmasa ber atan INDIA bloc hruaitute hi Congress President Mallikarjun Kharge chenna inah an lo inhmukhawm tawh a ni.

<><><>

GAZA

Israel sipaiten Gaza an kahnaah mi 30 an thi a, an zinga atam zawk hi hmeichhia leh naupang an ni. Israel sipaite hian Central Gaza strip-a Nuseirat camp an kap nia hriat a ni a. He hmun hi chenna tur nei lo te tlankhawmna sikul a ni a. Israel indo thlawhnaten classroom pathum aia tlem lo an bomb niin tualchhung media te chuan an sawi a ni.

Hetihlai hian Israel chuan an puhna chhangleitin Nuseirat-a UNRWA school-ah hian Hamas hel biru te an kap tih sawiin ruahmanna leh tumbik fel tak neia thil ti an ni anti a. Hamas te chu UNRWA te enkawl school, hospital leh civil mite hmunhma leh UN agency ten Palestine ralhlante an dahna hmunte chu inkulh nana hmanga a puh ve thung a ni.

<><><>